



DEO OPTIMO MAX.  
UNI ET TRINO.

VIRGINI DEIPARÆ, ET S. LUCE  
Orthodoxorum Medicorum Patrono.



QUÆSTIO MEDICA,  
CARDINALITIIS DISPUTATIONIBUS  
*manè discutienda, in Scholis Medicorum, die Martis decimâ-nonâ  
Martii, anni M. DCC. XXXVII.*

M. FRANCISCO BAILLY,  
Doctore Medico, Præside.

*An sanitaris præsidium, Equitatio?*

I.



UBIGINE quietum ut obducitur metallum;  
sic languet otio corpus, & hebescit. Hinc dira  
ægritudinum ac malorum cohors, quam secum  
invehit desidia. Summa prosperæ valetudinis  
tuendæ ratio, in eligendis, regendisve corporis & animi  
motibus versatur. Omne punctum feret, qui beatus nove-  
rit *Gymnasticæ* legibus obtemperare. *Gymnasticæ*, Medicæ  
præsertim ditionis ars, recentioribus forsân usitata minùs,  
à veteribus impensè fuit exulta. Hujus ad fovendam,

(a) Petrus  
Joann. Burette  
quest. Card.  
s. Maii.  
1707.

restituendamve sanitatem erat commendationis apud Græcos & Latinos, ut in publicæ administrationis partem veniret; ut (a) suos hæc haberet Magistros, sua jactaret *Gymnasia*, suis thermis ac palestris gloriaretur. Infinita propèmodum & incredibilis, quibus delectabantur, *exercitiorum* varietas? Quot enim artes erant machinati, quibus, & gladiatores pugilesve ad luctam, & milites ducesve ad bellum informarentur? Quot ludicras *exercitationes*, quarum usu, vel incorrupta servaretur corporis habitudo, vel depravata recrearetur? At quoniam inter tot exercitiorum species, quædam spontè, hoc est, propriis naturæ viribus peraguntur ut cursus, *saltatio*, cantus, ambulatio, natatio, *globi volutatio*, disci jactus, parva longaque pila, *jaculatio*, *pila malleus*, piscatus, aucupium, *venatio* saltem pedestris, &c. Quædam autem alterius moventis operâ indigeant, ut perficiantur; quales sunt *equitatio*, *navigatio*, vectio, *gestatio*, agitatio in cunis aut lectis pênsilibus, quibus & adjungi possunt *frictiones*, *unctiones*, *asperisiones* & similia, quæ nonnunquam ludos ejusmodi vel antecedunt, vel subsequuntur. Quoniam adhuc ex ipsis, nonnullæ certas duntaxat corporis partes; plurimæ verò corpus universum exagitant: aliæ quidè vehementius, remissiùs aliæ; ideò Medici sapientis est, dum convenit, definire, quid auxilii, quidve damni hoc vel illud exercitii genus, homini vel sano, vel agrotanti sit allaturum. Præstantissimum interim, ac tutissimum homini, *Gymnastices* subsidium affirmaveris, quo sanitas ejus vel præfens confirmatur, vel absens instauratur. Non aliundè repetenda hujus artis efficacia.

## II.

**V**ARIA, quot quot *Gymnastice* suppeditat homini, præsidia, in eâ planè consistunt motûs specie, quam *exercitationem* dicunt. *Exercitationis* nomine intelligenda venit rerum *non naturalium* una, per quam vel corpus universum, vel quædam duntaxat ipsius partes, voluntariè

quidem, at paulò vehementius, ad anhelitûs alterationem usque, moventur & agitantur. Laboris quoddam genus est quo sanitati ludicrè consulitur. *Æquis* nempe suscepta conditionibus *exercitatio*, quot mirabiles effectus præstat in corpore? *Liquidorum* enim itus, reditusque, cum à repetitis *vasorum & musculorum* ictibus pendeant; cum in labore, horum & illorum augeantur motus, tunc *vasa* quibus irrigantur *musculi*, *pressionibus* iteratis validius propellunt sanguinem in angustiora quidè loca, si sint ex *arteriarum* numero; eundem verò revertentem, cum *venosa* sint, ad ampliora sollicitant. Hinc *musculorum thoracis*, & *abdominis* adauctâ *systole*, vehementius pressa quæ subjiuntur tum *viscera*, tum *vasa*, muneribus suis defunguntur alacrius. Hinc *artuum musculi*, *contractionibus* iteratis, *canales*, quibus instruuntur, calcaribus quasi adhibitis, invitant, commissos liquores urgent identidè, & urgendo comminuunt; itaut omnium *circuitus* evadat facilior, succedatque molecularum quibus constant, absoluta magis & frequentior *attritio*, quam statim excipit *secretionum*, ac proinde *functionum* omnium integritas. At quantum juvat æquabilis *exercitatio*, tantum immoderata nocet. Violentiori enim corporis motu, *pectus* universum non leviter excandescit; stagnat *sanguis* intra *pulmonum* dædaleos anfractus; asperiores in abdomine patitur *musculorum depressiones*; *diaphragma* molestius complanatur: *vasorum abdominis* majores *trunci*, mole *viscerum* obruti, *sanguinem* pariter & difficilius admittunt, & reddunt ægrius: *capillaria* totius corporis *vasa*, fervidiori & uberiori turgent *sanguine*. Crassescens inde *cruor* lentius multò progreditur, hæret in minoribus *vasis*; ac tandè interceptis *secretionibus*, variæ in variis corporis partibus *obstructiones* sobolescunt, morborum prodromi vel infelicitissimi. Tot igitur incommoda si, vel præcavere, vel expellere animus est: ad illud confugas artis *Gymnasticæ* præsidium, quod tutò valeat *sanguinis & circuitum*, & *attritum* æquabiliter promovere.

**A**ERE, cibo & potu, motu & quiete, somno & vigiliâ, *excretis & retentis*, nec non & animi pathematibus, quibus vivit homo atque conservatur, iisdem & affligitur & occidit. Corpus enim humanum etsi nec per se constituunt, nec per se lædunt, res quas vulgò non *naturales* vocant; hominis tamen conservationi, ac tutelæ plurimum conducunt si prudentèr administrantur; alióquin, haud rarò lethum ejus accelerant. Sano ut varium expedit vitæ genus; sic nec una, nec eadem omnibus convenit vivendi ratio. Ad naturam, sexum, ætatem, tempestatem, corporis habitum, victum, consuetudinemque singulorum, varia debent præsertim accommodari *exercitiorum* genera. Oportet, inquit Hippocrates, (a) laborum vim, ut par est, non solum internoscere, sed etiam indolem eorum, quibus hi, vel illi labores imponuntur. Hinc in cunis, lectulis, aut ulnis nutricum infantes agitari solent. Hinc pueri ac potissimum adolescentes, quemlibet ad motum non minus apti, quàm proclives. Hinc juvenes, robusti, fortes, asperioribus ac diuturnioribus indulgere nati sunt operibus, quàm senes, molles, & macie confecti. Quin imò durioribus assueti laboribus, naturâ quamvis debiles, infirmi, vel senes, labores eosdem ferunt faciliùs, quàm insueti, robusti tamen, juvenes, & ad constitutionem athleticam penitus accedentes. Quanta igitur in Medico requiritur prudentia! quanta sagacitas, ut cuique hominum genio, ac temperamento, speciem, modum, tempus, locum & durationem *exercitationis* tutò queat adaptare? Ne tamen cunctando idoneorum in morbis temporum præterlabatur opportunitas; hanc in genere præscribat *Medicus exercitationis* speciem, utpote saluberrimam, in quâ cum animos, tum corporis partes, vel omnes, vel aliquot duntaxat, nunc simul, nunc vicissim, ad initia saltem levissimæ *lassitudinis* contigerit exerceri. Hujus autem generis ac virtutis *equitationem* esse quis negaverit? Si præsertim in aëre, tempore,

(a) Lib.  
1. de diet.

loco, duratione, graduque convenienti hæc suscipiatur; si non subfultim, non succussatim, at gressu lento, incessu molli, & ex ordine composito procedat. *Equitatione* nimirum sic institutâ, quænam alia vel ad tuendam, vel ad reficiendam sanitatem accommodatior excogitari poterit *exercitatio*? quænam utilior? quæ jucundior? An blandiori alio, vel æquabiliori *Gymnasticæ* motu poterit *Sanguis* & *circuitum* faciliorem, & expeditiorem *tritum* adipisci?

## I V.

**M**OVEMUR vel ex nobis, vel ab aliis. Actionum, quæ solitis naturæ operâ perfici nequeunt, saluberrima omnium & nobilissima, *equitatio*. Peculiaris est ambulationis, aut vecturæ species; dulci pariter & utili sic temperata, ut difficile sit admodum judicari, nùm plus emolumenti corpus, quàm animus oblectationis ex eâ percipiat. Ambulationis hujus organum, aut instrumentum, equus: à quo tamen non prius vehitur sessor, quàm & equus à sessore motum jam acceperit *Mutuat hic oculos*, (a) *mutuat ille pedes*. Equus domi forisque utilissimum animal, generosum licet ac superbum, quot interim docilitatis, fidei, vel amoris in dominum præbet indicia, si liberaliter instituitur! Formâ, pulchritudine, colore, sexu, moribus, natalibus, officiis aliisque adjunctis, inter se differunt equi: sive ad pompam, pugnam, *admissuram*, vecturam, aut prædam nutriantur. Diversa equorum nomina, ut discrimina, hîc recensere nec vacat, nec expedit; dispares eorum gressus tantummodò discernendi: quos potissimum (b) ad *peditationem*, *trottationem*, *cursum*, & *ambulationem* revocant equifones. *Peditationis* motus, lentus est, humilis, & mollis; *trottationis* autem, concitatus, altus & durus. Hoc in utroque incessu, oppositorum laterum pes anterior & posterior similem servant tenorem; cum eo saltè discriminine, quod in *trottatione* oppositorum laterum anteriorem simul & posteriorem pedem attollat equus; in *peditatione* verò non simul, sed vicissim hunc, vel illum moveat, ab anteriori dextri

(a) *Alciat.*  
*Embl.* 160.

(b) *Gallicè*  
*le Pat.*  
*le Trot.*  
*le Galop.*  
*l'Amble.*



lateris semper inchoando. Currit equus, ubi *saltando* præceps agitur in anteriora, pedesque ipsius anteriores simul, simul & posteriores tellurem deserunt, eam simul omnes protinus pulsaturi. *Cursu*, omnium equi motuum tametsi velocissimo, non adeò concutitur, aut excrucietur sessor, quàm *trottatione*. *Ambulatio* demùm, est levis, alterno crurum explicatu, facta gressuum *glomeratio*, in quâ ejusdem lateris anteriorem simul, & posteriorem pedem erigit ac sublevat equus, dùm ambo lateris oppositi pedes humum simul quatunt ac subigunt. Non vulgaris hic incedendi typus, etsi volubilis, mollis tamen; eoque mollior & salubrior, quò propius terram, non altè sublatis, at quasi tractis pedibus peragitur. Hinc alternis crura explicantes equi, facillimam sessori præbent vecturam, omnis molestiæ vel succussus expertem. Ab hoc quadruplici *progrediendi* modo, dicuntur equi, vel *gradarii*, vel *tortores* aut *succussatores*; vel *cursores* aut *bellatores*, vel *tolutarii* aut *asturcones*. Quisquis igitur ex Medici præscripto, *equitationi* voluerit indulgere, *tolutarium*, aut saltèm *gradarium* eligat equum, è *cantheriorum* numero, bonis moribus, suisque ad ambulandum ornamentis omnibus instructum, Mox conscensurus equum; laxis tantillum habenis, virgâ & jubâ firmiter, ut artis est, sinistrâ manu simul apprehensis, pede lævo in lateris ejusdem stapede collocato, famulis ex alterâ parte ministrantibus, dextrâque manu ad posteriorem Ephippii arcum admotâ, eoque subnixâ, libret corpus, ita ut super Ephippium dextrâ tibiâ in latus idem trajectâ, natibus super equo resideat; cùm jam refederit sessor, paulisper conquiescat, habenas coæquet, easdem molietur sinistrâ, dùm virgam dextrâ feret; tunc feminibus mollièr suspensis, erecto capite, oculisque inter aures equi ad anteriora defixis, minutis à gradibus incipiendo, ad celeriores sensim provocet equum, donec, initia levissimæ *lassitudinis* expertus, ad remissos paulatim devenerit. Quid plura? Tandùm pergat iter (toriesve renovet) quandiùm, & amænâ locorum varietate

mens, oculique delectabuntur; & aëris liberè inspirati serenitate recreabuntur pulmones; & blandâ *tolutarii* gressuum *glomeratione* cuncta *viscera* æquabiliter exercebuntur. Sic, ut reficiantur vires, non atterantur; attenuentur, non dissolvantur *succi*; promoveantur, non depraventur *secreciones*.

## V.

QUIS porro debitas *equitationi* laudes elevet, huic nisi sustinendæ impar? Sibi convenientius quærat exercitii genus: nil vetat. Cujuscunque indolis, sexûs, ætatis, & vitæ instituti hominibus *equitationem* non congruere, fatentur omnes: nec diffitemur. Quid inde? An idcirco, reliquas artis *Gymnastica* motiones utilitate non vincet *equitatio*? Cæteris enim paribus, quænam alia felices eventus, æquis susceptæ conditionibus, *exercitationi* referri solitos, poterit efficacius producere? Hujus est præstantiæ, quæ, vel defessos labore delectet ac reficiat, vel studio de fatigatos non exhauriat. Est in eâ, unde corpori robur, vigor animo restituantur. Molli & blando *asturconis* incessu, movetur quidè universa corporis moles, at non commoveatur; excitantur *viscera*, non concutiuntur; expediuntur *artus*, non franguntur. Hujus ope, *solidas* inter & *fluidas* corporis partes nativum confirmatur *æquilibrium*. Suus *villis contractilibus*, quibus, *vasa* & *musculi* constant, conciliatur elater, sua *liquoribus* fluxilitas asseritur. Hinc alimenta subiguntur felicius, *succi nutritii* mirum in modum distribuuntur, *recrementa* potentius disponuntur ad *secessum*, *functiones*que corporis omnes perficiuntur alacrius. Verum in sanitate tuendâ si tantum valeat *equitatio*, quid in eâdem instaurandâ non poterit, ægri præsertim viribus accommodata? Quot morborum contumaciam optima plerumque (a) medela est? Hinc in veterum neotericorumve scriptis ac monumentis, nullum *exercitationis* genus ad morborum curationem, tam faulstè, tam frequenter, tam prosperè adhibitum observatur, quàm *equitatio*. Sic (b) *Epilepsia*, *Cephalea* (c) *Surditate*, (d) *Ictero* & (e) *Hydrope* divexatos,

(a) Petr.  
Beverie quest.  
Quodlib. 28.  
Nov. 1715.

(b) Lib.

1. Cap. 15.

(c) Lib. 3.

Capit. 6.

(d) Lib.

9. Cap. 3.

(e) Lib. 9.

Cap. 3.

equitationis auxilio perſanabat Alexander Trallianus. Sic (a) *Diarrhæam*, Celfus; (b) *Podagram* Theodorus Prifcianus oppugnabat. Sic idem (c) Prifcianus & (d) Aetius *ſpleniticis* medebantur. Simili *Gymnaſtices* adminiculo, *ſingultum* curabat idem (e) Aetius. Sic *Aſthmaticis* ferebat opem (f) Cælius Aurelianus. Sic in *colicâ* bilioſâ, *diarrhæâ* colliquativâ, *tabe*, *phthiſi* confirmatâ, *hypochondriacis* *hystericis*que affectibus, & aliis pertinacibus morbis, *equitationem* nunquam non cum uberrimo fructu à ſe imperatam, paſſim reſtatutur (g) Thomas Sydenhamius. Quin etiam (h) *podagrici*, dum equo vehi poſſunt, ſi non ſanantur, ſaltem leviùs laborant. Morborum nempe contumacium ſedes & origo, cum in viſcerum abdominis præſertim *obſtructione* poſitæ ſint. Cum hæc *exercitationis* ſpecie impetus ferè omnis in *ventrem* fiat inferiorem; nil mirum, ſi leni, repetitâ, & conſtanti equi *ambulatione* cuncta viſcera, ſervatis ſemper naturæ periodis, tremulo cieantur motu, quo & innatum brevi recuperent *tonum*, & ſtagnantes ſuccos obſtructionum cauſam, feliciter excutiant. *Equitatio* non fiat ſtatim à paſtu, non ubi fames urget, non in locis aſperis, non diutiùs in aprico; at ſub umbrâ potiùs, in aëre ſudo & ſalubri. Ab eâ tamen abhorreant *nephritici*, *calculi* laborantes, aliique huic ferendæ minus idonei. Nullus igitur, vel *cauſarius* vel *ægrotans*, equo vehendum curandumve, ſe tradere vereatur, modico primùm itinere, donec majora in dies ſpatia gradatim, ſemèl iterum atque iterum emenſus, tandem non deſiſtat, quin ſanitatem, aut firmiorem corporis conſtitutionem obtinuerit. Naturæ lapſus, *intemperiei* vitia, & errores in victûs ratione commiſſos, hæc equeſtri *ambulatione* qui jam deleverit homo, An non criminis loco putaverit Medico poſt hæc indigere?

Ergo ſanitatis præſidium, *Equitatio*.

Proponebat Pariſiſ, JOANNES - JACOBUS BELLETESTE;  
Pariſinus, Baccal. Medic. A.R.S.H. 1737. à ſextâ ad meridiem.

Typis QUILLAU, Univerſitatis & Facultatis Medicinæ Typographi, 1737.